

## CESETA DE SAN VIZENZO DE PROMPICAI

L orator l é stat inaugurà del 21 de maio 1659 e l é entitolà a San Vizenzo Ferrer fegurà sun la pala d'altar auna a la Madona e San Lugan, opra del artista agordin Domenico Zanchi (1747-1814). Da inte i é cegnui mobili prezios, nosseche ex-voto tant che picioi cuadret empiturai, n piat de la carità e zesandei del XVI secol. Da le bande del salon l é metude fora doi tele de grande dimensioid a soget da la Bibia de Gregorio Lazzarini (1655-1730) "L'encoronazion de Joas e mort de Atalia" "Salomon sun la mula de David" depente del 1724. Ogni an, l luni de Pasca, i endegna la tradizionala "Sagra de San Vizenzo" o "Sagra del fanciullo". Da nossacan chesta storica festa la vegnia síada ai 5 de avril, dì del sant, e anca al didancoi la reciama n grum de visitador da tut l Agordin a passà intefora per le carateristiche burele de Le Vile, fornide su da grafit e pareci de dasses onde che se mostra fora dei pop de paia e vestii per l'ocasion.